



Ulloq: 19. juni 2020

Tusagassiorfinnut nalunaarut

Immikkut ilisimasallit siulliit tusarnaarneqartut

Inatsisit tunngaviusussat pillugit Isumalioqatigiissitat 18. juni 2020 ataatsimiipput, pingajussaanik.

Piffissap imaalinerani pingaarnerutillugit eqqartorneqarput inatsisini tunngaviusussani aalajangersagassat tunngaviatigut eqqarsarnartoqartut aammalu isumalioqatigiissitat sulineranni nukinnik ilisimasanillu atorluaanerunissaq.

“Inatsisinut tunngaviusussanut missiliuut majip qiteqqutileranerani maannamut suliarivarput”, taama unnerpoq Ineqi Skourup Kielsen, isumalioqatigiissitat siulittaasuat. Suleqatigiissitanut pingasunut agguataarluni sulisoqarpoq, taakkualu sulinertik pillugu ataatsimiinnermi isumalioqatigiissitanut killiffissiorput.

Tamatuma saniatigut immikkut ilisimasallit siulliit missiliuut pillugu oqaaseqaatiminnik saqqummiillutillu nassuiaapput. “Isit allat atorlugit taamatut saqqummiussuinerit paasisaqarnarput, soqutiginarlutillu. Inunnik immikkut ilisimasalinnik amerlanerusunik isummersuisissatsinnik sulisitsissalluta maanna piareerpugut, nunatsinneersunik nunanilu allaneersunik”, naggasiivoq Ineqi Skourup Kielsen.

Ukiap tungaanut pisussat ilagaat inatsisini tunngaviusussani aalajangersagassat ataasiakkaarlugit itisilerlugit suliareqqinneqarnissaat, aammalu inatsisit tunngaviusut pillugit inunnik qaammarsaanissap paasisitsiniaanissallu aallartisarneqarnissaa.

Isumalioqatigiissitat ajuusaarutigaa Atassut aalajangersimammat Isumalioqatigiissitanit tunuassalluni, soorlu siusinnerusukkut Suleqatigiissitsisut aamma tunuareersimasut.

Isumalioqatigiissitat erseqqissassavaat sulineq piffissaq ungasissoq isigalugu suliaammat, inuiaqatigiillu namminersulivinnissamik aalajangeranni atuutilersussanik inatsisissatut missiliuusiorluni. Innuttaasut aatsaat namminersulivissallutik aalajangerpata inatsisissatut missiliuut Inatsisartunit, naggataatigullu innuttaasunit isummerfigineqassaaq.

Attavigisassaq:

Ineqi Skourup Kielsen, isumalioqatigiissitat siulittaasuat

Mobil nr.: 587331